

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuut marlunnik immikkoortoqarpoq:

- Ajunaalernerni isumannaallisaanikkullu sullissinernut naleqqiullugu Namminersorlutik Oqartussat kisermaassisuuneranut ilaatitsinnginnerup annertusineqarnera.
- Akuersissummik pigisaqartumut sullissinerni akuersissuteqarfiusuni nunap immikkoortuini akitigut naligiissaarinissamut peqqusinissamut tunngavissap ikkunneqarnera.

Akitigut naligiissaarinissamut tunngavissamik pisariaqartitsinermut tunuliaqutaasut Unammilleqatigiinnermut inatsit tunuliaqutaralugu december 2020-mi Atuisartunut Unammilleqatigiinnermullu Aqutsisoqarfik aalajangiivoq Tusass A/S (siusinnerusukkut TELE Greenland A/S) nunap immikkoortuisa akornanni akitigut naligiissaariunnaarnissaanik kinguneqartumik.

Nuummi illoqarfinnilu allani imaatigut kabelimut atassusigaasut internetimik atuisinnaanerisa akikinnerulernera aalajangiinerup sunniutigisussaasimavaa. Paarlattuanik inoqarfinni sakkortusaavinnit satellitiniillu sullissivigineqartuni internet akisunerulerpoq. Taamaalilluni aalajangiinerup sunniutigisaanik najukkanik aallaaveqartunik attaveqatigiinnermut sullissinernik atuisinnaanermi aningaasaqarnikkut naligiinnginnerulersitsisoqarpoq.

Nalunaarasuartaateqarnermut tunngasuni aningaasaqarnikkut naligiissaarinerup aalajangiussimanissaa Naalakkersuisunit kissaatigineqarpoq. Taamaattumik akitigut naligiissaarinerup ataavartumik imaluunniit utaqqiisaasumik atorunnaannginnissaa qulakkeernissaa siunertaralugu Aningaasanut inatsimmi oqaasertaliisoqarnissaa Naalakkersuisut siunnersuutigaa. Oqaasertaliussat taakku Aningaasaqarnermut Akileraartarnermullu Ataatsimiititaliamit 2021-mi akuerineqarput aamma 2022-mi, 2023-mi aamma 2024-mi Aningaasanut inatsimmi ingerlateqqinneqarlutik. Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata taamatut allannortinnissaata siunertaa tassaavoq inatsisartut inatsisaanni atuuffigisaani aalajangersakkap inissinnissaa.

Atuisartunut Unammilleqatigiinnermullu Aqutsisoqarfiup december 2020-mi aalajangiinerata sunniutaa

Kontomi pingaarnermi 72.20.08 Nalunaarasuartaateqarnermi oqaasertaliussami aalajangersakkap aamma siunnersuutip matuma saniatigut National IP-Transit-imi akitigut Tusass naligiissaarisinnaajunnaarpoq, tak. Atuisartunut Unammilleqatigiinnermullu Aqutsisoqarfiup aalajangiinera. Naalakkersuisut naliliipput aalajanginnerup kingunerisaanik nunap immikkoortuini sisamani taakkunani akit assigiikkunnaassasut:

1. Nuuk (Canada-mut aamma Island-imut nunani tamalaani imaatigut kabelimut toqqaannartumik attaviligaasoq, taamaalillunilu National IP-Transit-imik atuinngitsoq).
2. Illoqarfiit Qaqortoq aamma Aasiaat (tassa imaappoq illoqarfiit Qaqortoq, Maniitsoq, Sisimiut aamma Aasiaat) akornanni nunami namminermi imaatigut kabelimut toqqaannartumik attaviligaasut.
3. Illoqarfiit nunaqarfiillu sakkortusaavinnut attaveqaasersuutininut atassusigaasut (tassa imaappoq illoqarfiit Nanortalik, Narsaq, Paamiut, Kangaatsiaq, Qasigiannuit, Qeqertarsuaq, Ilulissat, Ummannaq aamma Upernavik nunaqarfiilu).
4. Illoqarfiit allat, nunaqarfiit najukkallu Tusass A/S-ip nalunaarasuartaateqarnikkut sullissiffigisai (tassaasut qaammataasakkut sullissiffiusut).

Tele Greenland 2021-mi naliliivoq aalajangiinerup kingunerisaanik internetimut akigititat Nuummi annertuumik aammalu illoqarfinni imaatigut kabelimut attaviligaasuni annikinnerusumik appassasut. Akerlianilli inoqarfinni sakkortusaavitsigut, qaammataasiatigullu sullinneqartunut attaviligaasuni akitigut qaffaanerit annertoourujussuussapput. Qaffaanerit qaffasinnerpaat sumiiffinni qaammataasamut attaviligaasuni pisussaapput, tassani qarasaasiakkut paasisutissanik ingerlaartitsineq Kalaallit Nunaata sinneraniit pingasoriaatip missaanik qaffasinneruvoq. Piumasaqaatit tunngaviusut 2021-mili allangorsimanngillat, taamaalillunilu ullumikkut akitigut naligiissaarinerup atorunnaarsinnerata kinguneri taakkuusussaallutik.

Akitigut naligiissaarinissamut tunngavissaq pillugu siunnersuummut periarfissanik allanik ujartuineq

Oqaasertaliussamut siunnersuusiornermut atatillugu Tusass A/S-ip pilersuisussatut toqqarneqarneratigut ajornartorsiut aaqqinneqarsinnaanersoq isumaliutigineqarpoq.

Atuisartunut Unammilleqatigiinnermullu Aqutsisoqarfiup aalajangiinerani innersuussutigineqarpoq ungasissumiit nalunaarasuartaatitigut atassuteqarnermut akitsuuteqarnikkut aningaasalersorneqarsinnaasumik nalunaarasuartaatitigut sullissinernik Tusass A/S-ip pilersuisussatut toqqarneqarnissaanut Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni tunngavissaqartoq. Tusass A/S ungasissumiit nalunaarasuartaatikkut atassuteqarnermut akuersissuteqartuummat

akitsuut nunatta karsianut tutsinneqartussaassaaq kingornalu politikikkut suliarineqarneratigut salliutititsinikkullu Tusass A/S-imut akilerneqarluni.

Tusass A/S 2021-mi naliliivoq ungasissumut atassuteqarnermut akitsuut internetimi aamma qarasaasiatigut paasissutissanut suliaassaqarfimmi kaaviiartitaasa tamarmiusut 30 %-iata aamma 50 %-iata akornanni annertussusilinnut matussusiisussaassasoq.

Pilersuisussaataitanermit aqqissuussinerup kingunerisaanik sullissinerit suut pilersuinissamut pisussaaffimmut ilaatinneqarnerisut, aammalu qanoq akeqartinneqassanersut Naalackersuisut isummerfigisussaavaat. Taamaalillutik Tusass A/S attaveqaasersuutitut aningaasaliinerit annertunerisut annikinnerisullu suut ingerlatissanerai Naalackersuisut aamma isummerfigisussaavaat. Pilersuisussaataitanerup internetimik atuisartut pisariaqartitsinerisa annertusiartorneranut malinnaatinneqarnissaa qulakkeerneqassappat, aalajangiinerit taakkua ingerlaavartumik pisussaapput. Taamaalilluni aalajangiinerit pingaernerpaat Tusass A/S-ip periusissiaanut aningaasaliinissamullu pilersaarutaanut tunngasut suliffeqarfiup siulersuisuinit aalajangiisinnaatitaasunit Naalackersuisunut nuutinneqarnerannik tamanna kinguneqassaaq. Aningaasaliivigineqartussat ataasiakkaat annertuut, ukiorpassuit ingerlaneranni nalikillilerneqartartut pillugit aalajangiinissaq tamatuma ajornakusuulersittussaavaa.

Naalackersuisut naliliipput ajornartorsiutit qulaani eqqaaneqartut suli atuuttuusut. Aamma naliliisoqarpoq ungasissumut atassuteqarnermut akitsuut, piviusumik Nuummi sullitanut akileqquneqartussaq, Nuummi niuernikkut pissutsit taamaaqataannik inerneqarumaartoq, kisiannili Nuup avataani tiguisartuni unammilleqatigiinnermut annertuumik ajortumik sunniuteqassalluni. Sumiiffinni taakkunani Tusass A/S pilersuisussaasutut amigartooruteqarnermut akiliummik, unammilleqatigisat pissarsiarinnngisaannik pissarsisussaassaaq, peqatigisaanillu sumiiffinni inukinnerisuni ingerlatsinermi Tusass A/S-ip amigartooruteqarfigisaanut aningaasalersuisussamut unammillertiusut ungasissumut atassuteqarnermut akiliummik akileeqataassallutik. Taamaattumik ilimagineqarpoq pilersuinissamut pisussaaffeqarnerup Nuup avataani unammilleqatigiinnermik killeqartitsissasoq.

Taamaattoq aqqissuussineq Namminersorlutik Oqartussanut aamma Tusass A/S-imut allaffissornikkut nammackersuisussaavoq, tamannalu akileraartartunut aamma nalunaarasuartaatinik atuisartunut immikkut aningaasartuuteqartitsinermik malitseqartussaalluni.

Ataatsimut isigalugu aqqiineq taanna tulluassanngilaq.

Nunami ajunaalernerni isumannaallisaanikkullu sullissinerit Namminersorlutik Oqartussat kisermaassisuuneranut ilaatinnginneri

Inatsisartut inatsisaanni atuuttumi § 1, imm. 2, nr. 2-mi Namminersorlutik Oqartussat kisermaassisussaananut ilaatinneqanngitsut annertusillugu nunami ajunaalernerni isumannaallisaanikkullu sullissinerit ilaatilemnissaat tulluurtutut isigineqarpoq.

Qaammataasatigut sullissinerit amerliartuinnarlutik atortorissaarutitigut ineriartorneq tunuliaqataralugu nunami ajunaalernerni isumannaallisaanikkullu sullissinerit pitsaanerulersussaapput. Sullissinerit taakku attaveqaatit pingaarutillit ingerlateqqinnissaat ajornannginnerulersissinnaavaat, aamma sumiiffiit pillugit paasissutissat erseqqinnerusut annaassiniarnernut ingerlateqqinneqarsinnaallutik.

Imaatigut ajunaalernerni isumannaallisaanikkullu sullissinernut maannakkut killeqartitsinerup kingunerisaanik nunami sullissinerit taakku Tusass A/S-imut akuersissutip ataaniissapput. Akuersissut Namminersorlutik Oqartussat kisermaassisuunerannit killeqartinneqarpoq, tassa kisermaassisuuneranut ilaanngitsut pissutsit tassunga ilaatinneqarsinnaanngimmata. Tusass A/S qaammataasakkut oqarasuartaatinut, ajunaalernerni isumannaallisaanikkullu sullissinernik siunertaqartunut ingerlatitseqqittaraluartoq, assersuutigalugu InReach imaluunniit PLB (Personal Locator Beacon) ajunaalernerni isumannaallisaanikkullu siunertanut immikkut atorineqartussanik atortunik Tusass A/S ingerlatitseqqinneq ajorpoq. Nunami ajunaalernerni isumannaallisaanikkullu sullissinerit Namminersorlutik Oqartussat kisermaassisuuneranut ilaatinnginneri pillugu aalajangersakkap, suliffeqarfiup tamanna tulluurtissaguniuk, sullissinernik taakkuninnga ingerlatitseqqinnissamut Tusass A/S akornusersinnaassanngilaa.

Issittumi Sakkutuut Kalaallit Nunaannik nakkutiginnittuusut ilaasortaminut InReach-inik taakkunangalu sullissinernik neqerooruteqareerpoq. Siunnersuummi siunniunneqarpoq InReach-imi assigisaanilu nunami ajunaalernerni isumannaallisaanikkullu sullissinernik atuinerit inatsisatigut akuerisaalernissaat.

2. Siunnersuummi immikkoortut pingaarnertit

Siunnersuummi aalajangersarneqarpoq Tusass A/S TELE Greenland A/S-imut akuersissut pillugu Namminersornerullutik Oqartussat nalunaarutaat naapertorlugu akuersissummik piginnittutut akuersissuteqarfiusunut sullissinernut nuna tamakkerlugit akitigut naligiissarinissaanut Tusass A/S peqquneqarsinnaassasoq. Aalajangersagaq tassaavoq Aningaasanut inatsimmi oqaasertaliussamik 2021-mi eqqunneqartumik suleriaatsimik malittarisassatigut aaqquissuussineq, aamma 2024-mut Aningaasanut inatsimmi kontomut pingaarnermut 72.20.08 Nalunaarasuartaateqarnermut oqaasertaliussani ingerlateqqinneqarsimasoq. Siunnersuutip Inatsisartut akuerineqarnissaa ilimagisaasoq

sioqqullugu inatsisartut inatsisaata atulersinnerata peqatigisaanik Naalakkersuisut siunnersuutip atulersinnissaanut nalunaarummik suliaqassapput.

Siunnersuutip taaguut "ajunaalernerni isumannaallisaanikkullu sullissinerit" annertusissavaa nunami ajunaalernerni isumannaallisaanikkullu sullissinerit ilaaterlugit, taamaallaat imaanut tunngasuujunnaarlutik.

3. Pisortanut aningaasaqarnikkut allaffissornikkullu kingunerisassat

Akitigut naligiissarinissaq pillugu siunnersuummi siunertaq tassaavoq 2024-mut Aningaasanut inatsimmi kontomut pingaarnermut 72.20.08 Nalunaarasuartaateqarnermut oqaasertaliussani ingerlateqqinneqarsimasoq suleriaatsip atuuttup nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanut ilanngunneqarnissaa. Periuseq atuuttoq taamaalilluni aningaasanut ukiumi pineqartumi taamaallaat atuutissaaq, tamanna inatsisitigut ingerlateqqinneqanngippat.

Akitigut naligiissarinissaq pillugu siunnersuutip kingunerisaanik Nuummi nalunaarasuartaateqarnikkut pisortat aningaasartuutaasa sukkasuumik appassanngillat, sakkortusaaveqarfinni qaammataasakkut atassuteqarfinni nalunaarasuartaateqarnikkut aningaasartuutit sakkortuumik qaffassanngillat. Siunnersuutip taamaalilluni Avannaata Kommuniani aamma Kommuni Qeqertalimmi nalunaarasuartaateqarnikkut aningaasartuutit qaffannissai pinngitsoortissavai. Kommune Kujallermi, Kommuneqarfik Sermersuumi aamma Qeqqata Kommuniani nalunaarasuartaateqarnikkut aningaasartuutit ataatsimut isigalugit siunnersuutip qaffassaneraimaluunniit appartissaneraimaluunniit nalileruminaappoq, tassa taakku amerlanertigut imaatigut kabeleqarfiusuni kommunini ingerlatsiviummata. Aningaasartuutit appassanersut imaluunniit qaffassanersut pillugit isumaliutit taamaaqataanut Namminersorlutik Oqartussat immikkoortuinut suliffeqarfiinullu atuutissapput, tassunga ilanngullugit Nukissiorfiit aamma Peqqinnissaqarfik.

Nunami ajunaalernerni isumannaallisaanikkullu sullissinerit ilaaterlugit taaguutip "ajunaalernerni isumannaallisaanikkullu sullissinerit" annertusineqarnissaa pillugu siunnersuut illoqarfiit nunaqarfiillu avataanni nunami angallannermi ajunaalernerni isumannaallisaanikkullu sullissinerit atuinerit siuarsarnissaanut periarfissiivoq. Naatsorsuutigineqarpoq tamatumajuaasinerit pisariaqanngitsut pinngitsoortissinnaagai ujaasisarnerillu pisariinnerulersillugit.

4. Inuussutissarsiortunut aningaasaqarnikkut allaffissornikkullu kingunerisassat

Siunnersuummi siunertaq tassaavoq 2024-mut Aningaasanut inatsimmi kontomut pingaarnermut 72.20.08 Nalunaarasuartaateqarnermut oqaasertaliussani ingerlateqqinneqarsimasoq suleriaatsip atuuttup nalunaarasuartaatitigut atassuteqarneq

nalunaarasuartaatitigullu kiffartuussinerit pillugit Inatsisartut inatsisaannut ilanngunneqarnissaa.

Siunnersuutip kingunerisaanik nunami akitigut naligiissaarinerup atorunnaarsinnera pissutigalugu sakkortusaaveqarfiusuni aamma qaammataasakkut atuiffiusuni nalunaarasuartaateqarnikkut inuussutissarsiuteqartut aningaasartuutaat sakkortuumik qaffassanngillat Nuullu2 avataani sakkoortumik apparnatik.

Siunnersuut maannakkut pissutsinik ingerlatitseqqittussaammat inuussutissarsiortunut aningaasaqarnikkut imaluunniit allaffissornikkut kinguneqartitsinissaa naatsorsuutigineqanngilaq.

Maannakkut pissutsinut naleqqiullugu siunnersuut aningaasaqarnikkut allaffissornikkullu Tusass A/S-imut kinguneqartitsissanngilaq, tassa nunap ilaaniittunut amigartoorfiusartuniit nunap ilaanut sinneqartoorfiusunut aningaasanik nuussinissamut suli pisussaaffeqarmat.

Akit qaffasinnerusut piumasaqarnermut ajortumik sunniuteqartarmata Tusass A/S-ip sakkortusaaveqarfinni qaammataasakkullu atassuteqarfiusuni nalunaarasuartaateqarnikkut aserfallatsaaliinissamut ineriartortitsinermullu suli aningaasaqarnissaa siunnersuutikkut qulakkeerneqassaaq.

Nunami ajunaalernerni isumannaallisaanikkullu sullissinerit ilaatilerlugit taaguutip "ajunaalernerni isumannaallisaanikkullu sullissinerit" annertusineqarnissaa pillugu siunnersuut inuussutissarsiortunut aningaasaqarnikkut allaffissornikkullu kingunerlutsitsinissaa naatsorsuutigineqanngilaq.

5. Avatangiisinut, pinngortitamut inuillu peqqissusaannut kingunerisassat

Akitigut naligiissaarinnissamut tunngatillugu siunnersuut avatangiisinut pinngortitamullu kinguneqartitsissanngilaq.

Naatsorsuutigineqarpoq akitigut suli naligiissaarinnikkut innuttaasut peqqissusiannut iluaqutaasumik telemedicini ingerlateqqinneqarsinnaassasoq, nalunaarasuartaatinut atuinermut peqqinnissaqarfimmut aningaasanik ilasisoqartariaqarnani.

Nunami ajunaalernerni isumannaallisaanikkullu sullissinerit ilaatilerlugit taaguutip "ajunaalernerni isumannaallisaanikkullu sullissinerit" annertusineqarnissaa pillugu siunnersuut qaammataasat tunngavigalugit ajunaalernerni isumannaallisaanikkullu sullissinernik annertunerusumik atuinissamut periarfissiisaaq, tamatumalu kingunerisaanik illoqarfiit nunaqarfiillu avataanni nunami angallannermi isumannaallisaaneq qaffalluni.

6. Innuttaasunut kingunerisassat

Siunnersuutip kingunerisaanik nalunaarasuartaateqarnikkut akit sakkortusaaveqarfiusuni qaammataasakkullu atassuteqarfiusuni sakkortuumik qaffassanngillat Nuummilu sakkortuumik apparnatik.

Nunami ajunaalernerni isumannaallisaanikkullu sullissinerit ilaatilerlugit taaguutip "ajunaalernerni isumannaallisaanikkullu sullissinerit" annertusineqarnissaa pillugu siunnersuut innuttaasunut pitsaasumik kinguneqartitsissaaq, tassa nunami angallannermi innuttaasunut isumannaallisaaneq qaffassammagu.

7. Kingunerisassat pingaarnerit allat

Siunnersuut allanik pingaarutilitsigut kinguneqassanngilaq.

8. Pisortanik aamma kattuffinnik il.il. tusarniaaneq

Siunnersuut piffissami 29. april 2024-miit 27. maj 2024-mut ukununnga tusarniaassutigineqarpoq:

Kommune Kujalleq
Kommuneqarfik Sermersooq
Qeqqata Kommunia
Kommune Qeqertalik
Avannaata Kommunia
KANUNUPE
Nusuka
Kalaallit Nunaanni Sulisitsisut
Tusass A/S
Comby A/S
Greenland Television (GTV)
Nanoq Media
Inu:IT
Ilisimatusarnikkut attaviit
Asiaat radiuat
Issittumi Sakkutooqarfik

Ilanngussamut 2-mut aamma tusarniaanermi akissutininut tiguneqartunut innersuussisoqarpoq.

Siunnersuut aamma ulloq 30. april 2024-miit 27. maj 2024-mi Naalackersuisut tusarniaanermi nittartagaani tamanut saqqummiunneqarsimavoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Oqaaseq "imaatigut" peerneqarpoq, taamaalillunilu ajunaalernerni isumannaallisaanikkullu sullissinerni sumiiffiit annertusineqarlutik, taamaalilluni nunami ajunaalernerni isumannaallisaanikkullu sullissinerit aalajangersakkamut ilaalerlutik. Ajunaalernerni isumannaallisaanikkullu sullissinerit taamaalillutik Namminersorlutik Oqartussat kisermaassisuunerinit ilaatinneqanngillat, imaatigut imaluunniit nunakkut atorneqarnerseq apequtaatinnagu.

Ajunaalernerni isumannaallisaanikkullu sullissinernut ilaapput VHF, MF, HF, PLB, Inmarsat C, Iridium imaluunniit Inreach. Tassunga ilaapput sinerissami radiukkut sullissinerit naalagaaffimmit isumagineqartut.

Ajunaalernerni isumannaallisaanikkullu sullissinerit taakku siunertaasigut nassuiarneqarput. Taakku ajunaalernerni imaluunniit isumannaallisaanikkut sullissinerit upalungaarsimanissakkullu pisunut kalerrisaarinissamut naatsorsuussaapput. Tassaasinnaavoq pilertortumik ajornartoorneq imaluunniit sumiissusersinikkut paasissutissanik pissarsiniarnissamut tungasunik annaassiniarnermi oqartussanik aggersaanissaq. Tassunga aamma ilaapput annaassiniarnerit pisariaqanngitsunik suliniuteqarnerit pitsaaliornissaat siunertaralugu kinguaattoornerit pilersaarutilluunniit allanngortinneri pillugit ilaqtutanik allanillu attavinnik ilisimatitsinerit.

Nr. 2-mut

Sullissinerit akuersissuteqarfiusut pillugit akitigut nunami naligiissaarisoqarnissaanut akuersissummik piginnittoq Naalakkersuisunit peqquneqarsinnaanera aalajangersakkami aalajangersarneqarpoq. Akitigut naligiissaarineq attaveqaatinik akuersissuteqarfiusunik sanaartornermut ingerlatsinermullu aamma sullissinernut akuersissuteqarfiusunut aningaasartuutit isertitaniit appasinnerusuniit attaveqaatinik akuersissuteqarfiusunik sanaartornermut ingerlatsinermullu aamma sullissinernut akuersissuteqarfiusunut aningaasartuutit isertitaniit qaffasinnerusunut nunat ilaanut isertitanik akuersissummik piginnittup nuussineratigut pissaaq.

Illoqarfinni nunaqarfinnilu tamani sullissinernut assigiinnut akinik assigiinnik ingerlatsinissamut akuersissummik piginnittumut Naalakkersuisut peqqusinnaapput.

Akigititanik naligiissaarineq annertuukkaanik ingerlataqartumik pissaaq.

§ 2-mut

Inatsisartut inatsisaat 1. januar 2025-mi atuutilissaaq.

Ilannugsaq 1

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Siunnersuut</i>
	§ 1 Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni nr. 31, 23. november 2017-imeersumi uku allanngortinneqassapput:
2) imaatigut ajunaalernerni isumannaallisaanikkullu sullissinerit.	1. § 1, imm. 2, nr. 2, ima oqaasertaqarpoq: ”2) ajunaalernerni isumannaallisaanikkullu sullissinerit.”
	2. § 5-ip kingorna immikkoortumi "Akuersissummik nalunaaruteqarnermi" ilanngunneqassaaq: ” § 5 a. Naalakkersuisut sullissinerni akuersissuteqarfiusuni nunap immikkoortuini akitigut naligiissaarisoqassasoq akuersissummik pigisaqartumut peqqusisinnaapput, tak. § 5.”
	§ 2 Inatsisartut inatsisaat 1. januar 2025-mi atuutilissaaq.

Ilanngussaq 2**Tusarniaanermut allakkiaq**

Siunnersuut piffissami 29. april 2024-miit 27. maj 2024-mut tamanut ammasumik tusarniutigineqarsimavoq.

Ilisimatitsissummi matumani pineqarput suliffeqarfiup iluani tusarniaaffigisassat ilanngunnagit tamanut ammasumik tusarniaanermi inernerit.

Siunnersuut suliniaqatigiiffinnut suliffeqarfinnullu ukununga nassiunneqarsimavoq: Kommune Kujalleq, Kommuneqarfik Sermersooq, Qeqqata Kommunia, Kommune Qeqertalik, Avannaata Kommunia, KANUNUPE, Nusuka, Kalaallit Nunaanni sulisitsisut, Tusass A/S, Comby A/S, Greenland Television (GTV), Nanoq Media, Inu:It, Ilisimatusarnikkut attaviit, Issittumi Sakkutooqarfik.

Kommune Qeqertalimmiit aamma Tusass A/S-imiit tusarniaanermi akissummik tiguisoqarsimavoq.

Tusarniaanermi akissutini tiguneqartuni ajornartorsiutit Naalakkersuisut oqaaseqaatai uingasumik allallugit naatsumik ataani issuarneqarput.

Kommuneqarfik Qeqertalik isumaqarpoq § 1, imm. 2, nr. 2-p allineqarnissaanut siunnersuut nunami ajunaalernerni isumannaallisaanikkullu sullissinerit ilaatilerlugit Kunneqarfik Danmarkimiit tiguneqartut sullissinerit sanaartukkallu sullissinerniit sanaartukkaniillu tiguneqanngitsunit immikkoortinniarlugit oqaasertalerneqarsimasoq. Tamanna Aasiaat Radioanut tiguneqanngitsumut kingunerlutsitsinnaaneranut kommuni ernumassuteqarpoq.

Inatsisartut inatsisaanni matumani siunertaq taamaallaat tassaavoq nunami ajunaalernerni isumannaallisaanikkullu sullissinernik innuttaasut atuisinnaanerisa inatsisinut naapertuutilernissaa. Aalajangersakkap annertusinerani taamaallaat pineqarput immikkoortut Namminersorlutik Oqartussat kisermaassisuuffianut ilaanngitsut. Aalajangersakkap taamaalilluni kingunerinngilaa imaatigut ajunaalernerni isumannaallisaanikkullu sullissinernik Namminersorlutik Oqartussat tiguisissasut.

Kommune Qeqertalik isumaqarpoq nioqputissat pisiortortarfiillu aalajangersimasut inatsisip nassuiaataani ajunaalernerni isumannaallisaanikkullu sullissinerit nassuiarnerini eqqaaneqarneri tulluannngitsusooq. Kommunimit siunnersuutigineqarpoq nalinginnaasumik siunertamillu tunngaveqartumik nassuiaateqassasoq.

Naalakkersuisunit maluginiarneqarpoq aalajangersakkamut nassuiaatini nalinginnaasumik siunertamillu tunngaveqartumik nassuiaateqartoq. Assersuutit aalajangersimasut nassuiaammut iluaqutaasutut allanngortinneqanngillat. Taakku assersuutaaneri malugeqquneqarpoq.

Kommune Qeqertalik isumaqarpoq nunap ilaani amigartooruteqartunut ikiorsiinissamut tunngavissiineq pisariaqanngitsoq, tassa akitigut naligiissaarinerup aningaasalersornissaata qulakkeerneqarnissaanut erseqqissumik paasinartumillu inatsimmi atuuttumi tunngavimmik atuuttumik peqareermat. Kommune Qeqertaliup akigititanik naligiissaanerit ammasumik aamma kinaassusersiunngitsumik piumasaqaataallutik ingerlanneqassanngippata ajortumik kinguneqaratarsinnaanera ernummatigaa. Akigititanik aalajangiiniarnermi piumasaqaatit ersarlunneri pillugu oqimaaqatigiinnginnerit pilersinnaasarput, innuttaasunut aamma suliffeqarfinnut innarliisinnaasumik, ingammik nunap immikkoortuisa isorliumanersaani inissisimasunut tunngatillugu. Aalajangiisuunerpaavoq akigititanik nalimmassaanerit suulluunniit peqataasunut tamanut naapertuuttumik aamma paasinartumik ingerlanneqarnissaat, attaveqaasersuutitik suliaqartunut tatiginninneq paariinnarniarlugu aamma isumannaarniarlugu innuttaasut nunap immikkoortuini sumiluunniit inissisimasut attaveqaasersuutitigut sullississutitut tatiginartunut aamma akilersinnaasunut attaveqarnissaat isumannaarneqarnissaa.

Naalakkersuisut naliliipput pilersuinissamut pisussaasumut toqqaanissamut periarfissamut innersuussisoqartoq. Nassuiaatini allaaserineqartutut Naalakkersuisut isumaqanngillat aaqqissuussinerup allaffissornikkut aningaasartuutitut niuerfimmilu unammilleqatigiinermut ajortumik sunniutitut assersuunneqarnera tulluartausoq. Nalunaarasuartaateqarnermi aningaasalersuinerup akitigullu naligiissaarinerup ammanerusumik ingerlanissaata qulakkeerneqarnissaa Naalakkersuisut sulissutigaat. Tamanna kingusinnerusukkut siunnersuuteqarnikkut piviusunngortinneqassaaq. Taamaattumik allannguisoqanngilaq.

Tamatuma saniatigut Tusassimiit tusarniaanermi akissutit tiguneqarsimapput oqaatigineqarluni siunnersuummut isumaqataallutik taamaattumillu allanik oqaaseqaatissaqarnatik.